

文節公奏議
下

歸下而盡歸於中飽之人淮南引地首尾四省仰食於弊者
官則文武印委各員吏則大小衙門書役以及商夥商廝商
船不可億計一議整頓則必羣起而撓之造謠植黨恐喝挾
制必使良法中阻而後已臣受恩深重總司兩淮鹽務自受
事以來孳孳講求業已洞見癥結若不力破情面決計革除
則是以畏葸瞻顧爲苟安以彌縫延宕爲敷衍非但無裨將
來而目前卽有一蹶不振之勢況當度支拮据又值節年水
災火災商情渙散已極天時人事皆須振新何敢更以帑庫
正課商民脂膏爲遊誑謗養奸蠹之計除清查庫款另行奏
辦外謹將淮南全局通盤籌畫以裕課之法爲恤災之方酌
擬章程十條敬爲皇上陳之

一按舊科則酌減外費以輕成本也查兩淮解京各款無論

正雜絲毫皆闕度支何敢議減惟按戊申綱科則以每年請
運八十九萬五千餘引合算每引攤銀五兩七錢一分除淮
北協貼外計每引徵銀四兩九錢五分加以鹽價船價等項
每引合銀十二兩二錢零成本未免過重今擬將帶完辛卯
以前及帶完辛丑折運欠課共銀四十二萬五百餘兩仍照
前督臣李星沅奏案停緩其外省鹽規匣費院司節省倉穀
月摺各役外飯食帶完備公酌存活支提帶外辦緩徵等款
尙可分別刪減銀二十八萬七千餘兩共計減緩銀七十萬
七千六百餘兩照八十九萬餘引核算計每引可輕成本七
錢八分零 一酌復額引加帶乙鹽以輕成本也行鹽愈少
則攤課愈重自不足以敵私若遽還前額又恐鹽多難銷今
擬提復原額二十萬引每綱實行一百九萬五千五百十引

比較八十九萬五千五百十引計可每引攤輕銀五錢數分
惟目前銀價昂貴成本仍形吃重而漢岸火災之後各商籲
求補運藉資調劑除折運案內節年殘引不計外查有乙未
綱已納錢糧未運之鹽疊奉部行催運有案擬請將此項納
過錢糧之鹽援照長蘆山東浙江加斤之案准其每引帶運
二百斤停止從前加二五配割章程以淨鹽六百斤出場又
可暗輕成本一兩零卽以貼補銀價是加斤旣係應運之鹽
卹商亦非另給之引合之減費復額每引共可輕成本二兩
四錢零 一永禁整輪疏通銷路以挽情誤也查鹽引到岸
以本速售爲利而整輪板價遂致滯銷自敝蓋緣奸商壟斷
甲鹽不售乙鹽不許開艙板定價值束縛通河陰售其自帶
之私明閣其正綱之引散商因而退阻私梟亦因而充斥道

光十年經前督臣陶澍奏請散輪大有起色乃近又創爲挨
售名目卽與整輪同意而其取巧之術又舍自己應運之引
懸而不運詭名他人代運凡運懸引壹千引者准帶融楚參
百引有緩納之銀款有提售之調劑不在整輪數內明明以
中食輕課之鹽賣楚岸重課之價名爲融銷實則虧課淮南
日疲良由於此今擬革除此弊務使商運隨到隨銷永不許
有整輪挨售等法以祛痼病 一核實岸費由司酌解以杜
浮冒也查楚西各岸緝私辦公之費向由岸商呈繳因浮濫
過甚經前督臣陶澍奏定每引肆錢有案近來楚西岸費多
至壹百肆伍拾萬兩是每引已增至二三兩不等核其分款
總帳有節禮壽禮賀儀程儀重支豫支各名色並有長隨家
人各署幕友使費不一而足其中商人浮開冒銷恐亦不免

是以上年湖廣督臣裕泰會飭湖北鹽道嚴禁今擬查照陶澍原奏每引酌帶銀四錢隨正繳納運庫由運司隨時詳明酌解楚西兩鹽道衙門分撥以資辦公而杜弊混 一分岸運銷利商便民也查道光十年前督臣陶澍原定章程本有武昌下游之黃州各縣及江西之湖口彭澤等縣江路遠隔八百餘里歷來商鹽必須運到湖北江西省城然後回折轉售往返腳價加重以致各縣引地全爲船私隱占議將各處額引豫填水程僉商運往以便水販就近銷售等語嗣因僉商未果遂爾中止今漢岸火災之後各商因資本不敷運鹽遲緩船私必較前更甚擬將楚西兩岸引鹽運到湖北江西適中之九江府卽聽商船就便發賣水販各赴各路其有情願運往楚西兩岸發販者亦聽其便至九江地方必須運派

廉幹大員設局駐劄一俟鹽船到彼驗明鹽引相符收回引目卽於鹽照內填寫引目收訖字樣加蓋委員鈐記引目既經收繳專以鹽照爲憑其照蓋用鹽政運司印信每張十引給商護鹽以爲水販分售之據所過州縣關津止許驗照毋庸查鹽城鄉水陸聽其零售毋得留難需索其各省地方文武員弁旣無稽查之責所有督銷考核應請免議以杜藉端擾累委員則籌給薪水不准向各商另取分毫違者以贓私論

一綱食鹽各岸畫一辦理也查淮南科則中路安池太向照楚西八折上江甯國及和州含山各食岸六折因中路爲楚西藩籬食岸逼近場竈故賣價較賤成本亦較輕迨後食岸滯銷取巧而融楚中路由場自綱夾私而侵占皆因成本輕重懸殊致啟趨避之端貽害甚巨今擬掃除積弊則食

鹽科則應與綱鹽科則相平聽商隨便指運一切章程均歸一律以杜避就 一官定場價以免居奇也科則既減商運自多場鹽必貴若不官爲定價必致擡價病商成本增重仍不足以敵私查南鹽高下不一應將各場所產分梁安二種酌中定價至貴不准過二兩四錢總以運至泰壩按一引淨鹽六百斤交商鹽要乾潔如滷潮色黑許商退交另買照依定價不准私相買賣並不准擡價尅扣其鹽價隨課繳官或呈明指買場垣或由官籤派價由官給如南產不敷准運淮北之鹽以杜居奇並平草價裁規費以輕場商之成本 一鹽包改細百斤以杜夾帶也綱食錢糧旣歸一律各省口岸隨商指運自一百引起至一千引止楚西皖蘇各岸聽其隨時納課請運並不作爲常額惟請運楚鹽者不得改赴江西

請運西鹽者不得改赴湖廣中食兩路亦然以杜冒越其各岸運數滿額卽止以防擁積至儀所子包向來湖廣八斤四兩江西七斤四兩食鹽五十斤大小懸殊原以杜混淆夾帶之弊然包小數多難於稽查應請楚西各岸一律改細一百斤大包俱外加包索滷耗包少則夾私亦少稽查較易一矜恤災商分年批補也上年漢岸火災燬鹽二十六萬七千餘引商本大虧自應援案免課補運惟全數准補不但庫款無出且恐岸鹽擁擠自宜分綱帶補今擬嗣後被災舊商凡請運新鹽一千引者准其配帶補運免課之鹽二百引仍予以限制每綱不得過四萬引之數其補運鹽斤仍照舊制四百斤不准再帶乙鹽如舊商無力情願自招新商代運者亦照每千引配補二百引之例其並非舊商招徠之商只准辦

運新鹽不准配帶補運 一刪除繁文以歸簡易也舊制請
運必須徧歷運司十九房科及四首領衙門委曲繁重守候
需時藉端指難事所恆有今擬嗣後各商請運所有正雜錢
糧鹽價同時並納仿照淮北票法遴派總辦委員設局核收
立卽給予庫照註明准其赴運重鹽迨解網見斤之後繳呈
庫收換給引目鹽照船照准其開江運岸一切繁文悉行刪
除不准首領及科房書吏與商人交首以杜積壓勾串各弊
向設十九房亦照吏庫禮兵刑工及承發房等名目酌量歸
併所有書役飯食按引八分繳庫由運司核定各房公事之
繁簡分別賞給以資貼補此外不准另取分毫違者加等治
罪運司一併嚴議 以上各條專爲除弊輕本約可省浮費
一百數十萬兩南鹽成本每引可省至四兩有零自出場至

到岸每斤成本約制錢三十文上下必可以暢銷無疑或謂
淮鹽引地四面受灌卽減之又減安能敵賤價之私不知貨
有高下淮南梁鹽色味甲於天下爲浙閩粵潞川省各私所
不及祇因成本旣貴水販作僞攪和居民不肯以貴價買灰
沙糴雜之官鹽而以賤價買白淨之私鹽非刑驅勢禁所能
強若果貨高價實卽稍貴於鄰私人亦爭買况官私價值相
等乎或又謂課額不加卽暢銷何益於國不知目前一綱之
課非數年不能清且奏銷亦止正課貳百餘萬又需拖延數
載是國家常遲數載之課且啟新舊套搭挪移之弊若果暢
銷則逐漸提前年清年鹽卽年清年款如淮北庚戌綱之課
已收於己酉之冬新舊永無套搭正雜永無挪移益孰大焉
且試行果效並可將壹百肆十萬引全行復還課額自增惟

奏請卷五
五
係收效以後之事未敢遽陳於試行之初總之弊既去則利無不興其理其勢當無或爽所有通籌淮鹺卹災除弊章程恭摺具奏是否有當伏乞皇上聖鑒訓示謹奏道光三十年二月初八日

查覆江蘇保甲社倉情形摺

奏爲遵旨查覆江蘇省現在辦理保甲社倉情形恭摺奏祈聖鑒事竊臣接准部咨欽奉上諭御史黃兆麟奏急籌三事一摺保甲爲弭盜要務社倉爲備荒善政營務捍禦□□着各督撫提鎮悉心經畫核實認真以圖報稱等因欽此伏查編排保甲互相稽察既可杜盜賊窩藏之地又可收守望相助之效懲惡勸善無不自保甲始洵屬爲政入手要義無如日久玩生不獨視爲奉行故事且將漸成擾民弊政其故皆

由於以官治民不知使民自治之法也臣就地方情形詳加體察衛民之法雖當責其成於官而地廣人眾總不如民之自衛爲切近而易因卽勸諭按戶支更以防盜賊爲由各按地方之遠近戶口之多寡酌分段落僱夫支更上下各段互相巡警協力守衛由一村一莊一鄉而至一縣一府一省聲勢聯絡眾志成城則盜賊無所托足小民□□身家自必欣然樂從是寓保甲於□□之中師古而不泥於古以紳耆董其事俾吏胥無從驛騷以州縣攷其成俾紳董不敢廢弛飭據青浦縣知縣林德泉酌議章程由臣覆加釐正刊刻通行數月以來漸有頭緒並據各營縣將積年巨盜長腳小二等多名擒獲解省兵役賄縱挑夫肆竊及私販硝斤等案亦皆先後破獲盜風可期稍戢謹將章程繕呈御覽社倉之法

久廢不行而江蘇人頗好善每多公捐穀石積儲公所
以備荒歉或減價平糶或按口授食立法各有不同統名
曰義倉道光二十九年大水爲災凡有義倉地方實資補助
臣於上年秋收登場之際卽通飭各屬查明向有義倉者則
勸諭紳董先將糶價趕緊採買歸倉其無義倉者亦俱設法
勸捐興辦卽據武進陽湖宜興荆溪江甯上元等縣紳耆首
先創議除有力殷富情願多捐義穀者聽其自便外仍各按
各鄉每田一畝酌捐穀一二三升不等彙儲公所卽以此鄉
之穀留備此鄉之用悉遵社倉成法變通辦理不事抑勒不
涉官吏公舉一鄉一村眾所信服之人專司出納已將所呈
章程現飭江甯府吳葆晉刊發各縣令俱仿照踵行應俟各
屬報齊再行奏請訓示以上二事皆因勢利導使民自衛自

養簡便易行庶不致因利成弊冀可漸臻上理至營伍之積
疲已非一日臣力求整頓□不過略有起色除將籌辦情形
隨時具陳外理合先行恭摺覆奏伏乞皇上聖覽謹奏
一總巡公所宜分設也四城各設一公所以爲董事督率牌
長辦事之區門面懸總巡公所匾額四鄉則各村照設一所
此項董事諭令地方紳耆公舉專司該處總巡事宜惟以明
白曉事爲要其素有訟案及不協眾情者不准保充一牌
長更夫宜慎選也各公所董事於該處地面擇其誠實不多
事者稟充牌長各按地段之遠近人戶之多寡酌定或一二
人或三四人其更夫亦由公所選充交牌長調度約束統於
年終核明有無失事分別造冊由董事送縣牌長勤慎給予
花紅匾額更夫則賞銀牌一鐮燈器械宜預備也各公所

董事於本處好義者勸令捐備更鑼鈎簾鎗燈籠等件每更夫一名給鑼一面鎗一枝並用鈎簾鎗以備救火燈籠寫明某所某牌巡更一切費資由董事經理牌長領給一巡更地段宜酌定也城內外及鄉鎮有街道地面民戶鋪戶鱗集約以若干戶爲一牌簡僻處所約以若干戶爲一牌每牌設牌長一名更夫若干名亦酌量定奪總須徹夜鳴鑼稽查路不斷人夜不息燈俾盜賊匪徒無從托足一稽查奸宄宜嚴密也每牌更夫如遇匪徒潛入行竊卽鳴鑼喊捕上下牌更夫一體鳴鑼協捕各家同出壯丁兇拏倘更夫怠惰遇匪不卽喊捕並上下牌更夫不齊心協捕以致匪徒遁跡均由該牌長告知董事將各更夫送縣嚴究一面另雇更夫巡查一巡更經費宜預籌也更夫無論雨雪終夜巡查自應酌